

小方壺齋輿地叢鈔

東遊日記

清泉王之春著

光緒己卯十月十八日由鎮江防營搭輪先數日稟報起程蒙沈幼丹制府 葆楨 批有深慮遠識必能驗諸實境之語

十九日抵滬劉吉六司馬邀遊未園園初爲徐雨之觀察所葺今已易主而規模如昔大約數畝編茅爲亭覆瓦爲臺有樓翼然有樹森然外以附皮杉木爲籬編成卅字梅花等式價廉工巧樸拙而饒古趣園中花草竹木布置井然花尤吠客鸚鵡呼茶異羽奇葩點綴生趣累石爲山高盈丈許玲瓏曲折入者如遊武夷步步引人入勝中鑿一池輕鷗矯翼瘦鴨呼名游魚噓沫於縠紋間見人不驚可手而掬池中設有暗機園丁以手撥之池水從石罅中上噴如輕塵微雨機滿水停顧視草木居然雨後光景殆智者所設施也滬上自互市以來繁富甲天下琳宮梵剎峻宇雕牆櫛比鱗次高聳雲際頗皆華麗綺縵之境豈且塵上求一清涼之境以滌塵心了不可得到此覺心目爲之一清

二十日晴浙甯余玉峰來寓詢及安徽董司馬創造機器船現將下水余前在省奉沈制軍面諭就便估驗該船遂同往觀乘車至虹口察其船堅結約長六丈餘寬不及二丈輪軸機括幾佔船身四之一說者謂不藉水汽火力縱能行走必不快捷余嘗見南史稱祖沖之造千里船純用機捩不藉煤火其巧妙與西國輪船無異至以千里命名則其迅捷自不待言且楊么之樓船激水其速莫比亦輪船之濫觴夫智者造物巧者述焉異巧絕能世不經見而步後塵者徒誇泰西之巧抑知中國固有先西人而爲之者邪諺云少所見多所怪見駱駝謂馬腫背獨不思武侯之流馬公輸之木鳶何以行於地上飛於空中自若也董君之造是船絕不倚傍他人成法縱難飛行絕迹當使精益求精務使泰西人見之知其聰明才力終出我中國之下也閱畢返寓已五點鐘戊初上東洋公司輪船同行者二人僕從三人先日買定上艙

票三張每張洋五十五元下艙票三張每張洋二十元均寫至橫濱口船爲明輪大桅二煙肉二船面開閣上艙爲客房寬廣七尺餘上下設榻二衾枕潔淨墊褥厚軟壁懸大鏡一玻璃燈一盥漱器及面巾香卓諸瑣物無不備樓中艙爲飯廳有長桌八張每張可坐十餘人瓶供花卉香氣馥郁辰正早餐午正中餐酉正晚餐食物皆外洋風味每餐先二刻鳴鑼一次屆時再鳴則當齊集飯廳食時每桌置菜單一紙聽客自點惟酒須向買辦房另沽侍者華夷各半服役勤謹下艙無房不獨役使無人即盥面亦無熱水每日三餐用方廣八寸深一寸之木盒盛飯匕許鹹小菜些須析小方木長三寸許爲箸每人各一飯後數人共茶一壺此外須開水泡茶溫水盥面了不可得即自帶熟菜點心亦無從煮養視坐上艙客不獨有上下牀之分直有天壤之別矣惟鴉片煙之禁甚嚴而防火患最密卽上艙客喫食水旱煙均須往前艙及外面平板站立客房及飯廳正艙各處除晚間一點燈外均不得攜一火種

二十一日晴早七點鐘展輪出吳淞口羅鍼指南崇明銅沙一帶岸樹蕭疏古人所謂江山之外第見風帆沙鳥煙雲竹樹者庶幾近之午初見大蕺山鍼轉正東申正越花腦山舵轉東向兼北一字泛大東洋一帆風利真有破浪如飛之勝

二十二日晴天曉觀日曠曠陽谷扶桑仰射吳采出海漸高不可逼視觀水初作淺碧色漸作蔚藍較過花腦尤黑辰後見高島屹立海中近視羣列三五如小星舟東北行又經五島將近日本境戍刻抵長崎停輪

二十三日天陰登舵樓望港口鬱環回抱勢趨東南山皆蒼秀有煙雲繚繞之態古之所謂三神山者是也辰後上岸至招商分局局事託廣裕隆代辦晤廣東潘鏡泉兄旋至恆昌啖粥一盂該店爲浙西王君所開屋宇修潔前有小園山茶欲開盆梅破萼有鳳尾蕉一本高六七尺許圍約四尺上結黃花花瓣密

攢如雞冠每瓣中綴紅子如銀杏大據云小兒出痘以此子繫於髮內即免驚風等險子內有仁研之成粉合小麥粉蒸食可耐飢七日說雖不經而古所謂鐵樹開花則信然也

鳳尾蕉俗呼鐵樹

少頃鏡泉遺价邀喫

午飯旋偕遊長崎市聞中華之貿易於此者約千三百人惜患也均未能一晤該處屋宇參差因地而高下曲折滿市車聲轆轤與得得之履聲互答蓋東人無論晴雨足皆著履遊倦少憩於東人家脫履入門滿地遍布長席小童引導入樓四壁精潔無纖塵窗戶洞啟雖地不甚大而引泉爲池依山樹木盆花砌草培植殊佳小坐片時散步至正覺寺即大音寺距山巔高不知幾尋丈瑩石爲級賈勇而登甫抵山門汗涔涔欲滴山間古木攢擎輪囷盤錯中土所不經見從山門遠望大殿尙有數百石級同遊者皆倦憊遂於酉初回船六點鐘即開輪矣

二十四日微雨啟輪輕風徐颺水波不興蓋由長崎越長門入裏海兩岸山環一水縈帶非復大海之汪洋一片凭舷遠眺諸山忽斷忽續或圓如覆笠或削如筆尖或嵯峨而厯亂或蒼翠而清奇恨不起宗少文而一二圖之以爲他日臥遊也未初抵鹿兒島停輪二點鐘該島監稅者來舟見余方據几作字索書數行余笑而與之欣然謝去窺其意若甚珍愛也者開行後舟行平穩無異長江晚間登樓閒步濤聲走風浪花噴雪時有漁舟上下燈火出沒於波濤間幾忘置身海外

二十五日晴遶海而行島嶼星羅所見豐前豐後人家多依山以居午後洋面稍寬遠望山形隱約帆檣梭織中正經明石島下有暗礁西初始抵神戶隨雇舟登岸宿何仰雲處亦辦理招商分局者也仰雲在東日久於該處情形甚悉暢談至夜深乃寢

神戶口又名茅港海口

二十六日晴辰刻梁燁煌來自大阪大阪府距神戶七十里昨晚仰雲以電信約之來遂於早飯後同坐火車往遊大阪煙雲屋樹過眼如飛約行四刻即至該處爲東瀛繁庶之區淀川繁賈設知府一旱道可

通西京街如碁盤道亦宏敞居民約數十萬家河水發源於西京到此分派數十小河鐵木橋八百餘載擊肩摩相屬於道中有石城表裏濠溝深廣望樓高遠鎮兵駐紮平秀吉之建築歷二百餘年閒步至花園山茶數百本種類莫名一體蘭葉寬二寸厚半分許據云均來中土而加以培養遂繁密如許外有鳳蘭高八九尺圍圓丈許非僅爲目之所未見抑且耳之所未聞誠奇觀也別有一種蘭葉如花彈於盆外惜非開時不知其花作何狀至於松老成龍梧高樓鳳一花一木別有雅致遊賞半日命車過歸則街中然燭繁如密星而車聲鑼鑼如雷電震驚至旦不息上下車處均有潔淨大房爲坐客憩止之所是晚宿梁煒煌處何筠如兄以患清恙不獲一晤亦惆悵也

二十七日晴辰後偕梁煒煌同坐火車返神戶煒煌於路指點青山間有人煙孤處即瀑布山惜火車不能停輪瞬息即逝沿途田疇開墾麥秧初茁彌望青葱田塍皆白石砌成野霽平分沃野平衍誠膏腴之府也考電氣報以銅爲綫約徑分許用西人所鍊電氣或架木上或置水中引而伸之兩頭均有機器繫之所通之音傳綫以行雖千萬里頃刻即達午後回舟六點鐘始開輪東駛

二十八日晴舟行內洋遙望南部諸島羣山糾紛漁艇賈舶上下出沒於波濤中惟見布帆遠颺時隱時現而已

二十九日晴舟抵橫濱行李上岸司關者傾箱倒匣查點甚嚴托辦理招商分局之羅朗卿代覓旅寓渠堅留下榻伊處供給豐隆是晚晤領事范君如蕉相與劇談東事甚悉

十一月初一日晴乘火車往遊東京計程七十里鑿山填海以通鐵路中途阻水架木橋里許共費金錢五十餘萬工亦頗勞距京數里許車即停輪換馬車歷遊城市入煙稠密街道寬宏所歷之地都不知爲何名惟任車夫執筆驅馳而已傍晚至一處樹木扶疏路旁有牌止車遂下車步行約三數里山勢雙分

中關大道西山樹木陰翳禽鳥啁啾昔人詩亂入池中看不見聞歌始覺有人來若以池字易一林字舉狀此處殊確東山老木杈杈枝盤曲皆數百年以上樹夕陽紅映樹影蕭條歸鳥尋巢千百成羣無與鷹行之列陣也按東京卽武藏州之江戸城舊爲將軍府地最爲關東形勝山內有舊將軍故冢舊署擬往訪尋而暮色迷離樹林中疏磬晚鐘錚錚互答循途而歸得先所止車處另雇車出東京沿街然電氣燈數千百盞如兩行紅燭中土卽夜夜元宵亦無此火樹銀花之璀璨也十一點鐘始返橫濱

初二日晴訪舊識日本友之麥布雅各

晤面親密拳拳可念

隨拉遊東畿全城窺其要領餘悉筆談晚歸酣睡

初三日晴辰後仍乘火車往東京至公使衙門拜何子峨張魯生兩星使蒙款宴甚殷以橫濱至東京火車往返費事留住該署并晤參贊黃君公度得讀其日本雜事詩采錄風土甚詳是晚與兩星使暢談至三點鐘始就寢

初四日何星使派委員張仲訪同遊淺草寺寺極宏敞距寺里許卽須下車植木爲柵柵內兩旁列肆百物齊備人語嘲嘲與木屐聲聒耳互應寺門外有燈籠二高約二丈禮佛者入寺門以錢擲木櫃內合掌喃喃不知所念何呪寺側另有關壯繆祠樓豎一橫匾題浩氣二字字高一尺蒼勁挺拔聞係日本七歲童子所書未知信否繞寺而西行半里計有花圃曰淺草園園之大約有十畝竹籬茅舍境極清幽園外有山巍然俯瞰杉松萬本翠襲衣裾天矯如游龍橫亘天末入園數武循櫓而西有晚菊莊菊花數百種不獨存傲霜之姿而殘花未萎饒有東籬風味花大如鉢本高於人卽非靖節閒情未有不愛此隱逸之品也折而之東小室數楹瑞香橘柚香櫺之屬皆以小盆植之高不盈尺禮所謂物以罕而見珍者也將入院門清香噴馥沁人心脾幽蘭數十盆花箭齊吐入室聞香徘徊不忍竟去少憩片時小童導入一亭山茶含葩半吐楊妃吐舌西子含顰與夫金盤銀盞色子間一捻紅編地錦之屬色色具備時遊行已久

口渴思茶適當墟少婦捧盤匝而來踞進香茗如瓊漿玉液透過十二重樓活者易爲飲誠然誠然繞園而東見紙糊木棚徧覆檐沿園丁逐一揭視則下皆土坑內實珠蘭茉莉夜來香諸品蓋所以蔽風雨也其護養之者至矣宜其花之獨繁茂於中土哉

初五日早微雨與日本大夫藤原氏談及初一日所遊之地知爲上野午後雨止命車復遊順道至東照寺寺建山巔四面蒼松喬木陰蔽天日中鑿石級曲折盤旋兩旁皆豎石燈如廟中之香鑪式身略小而高過之約數千盞近寺則以銅爲之古色斑駁望之如武仗森嚴繞寺之後而下石燈排列如前山有樹本爲草所擁覆者詢之知爲移植抵山之麓前有一湖榆柳環隄而植下設木凳以備遊人憩息湖心有亭一葦之杭可以得達時日色含山暮煙凝紫歸鴉數點噪息林端忽聞水上發聲則水鳥野鷺驚起羣飛紛不知其幾千萬翼呼僕策車初月如眉疏燈照眼歸署已七點鐘矣

初六日晴昨遊東照寺歸途車夫指檐牙高聳處謂余曰此教育博物院也明日易往觀乎余曰唯唯遂於辰飯後攜僕往遊距院里餘遙望有紅旂飄颻於半空者近前視之立石人一高近丈許下設一石池中藏機械激水上噴水清如鏡可鑑人也院外有方阱一深三丈餘方廣二丈內有熊鬚各一上以蠟鐵柱縱橫貫之阱中有小井可資其飲浴食物則自鐵柱隙中擲下熊鬚皆高近丈毛黃黑色見人欲啗猙獰可怖繞阱而西卽抵院門門者每人授竹籤一任其入內院宇宏廣分屋置器每屋設小木椅數張以爲學者之所坐息方者矩圓者規權衡斗量尋尺皆備其有神明於規矩繩尺之外者口所不能言筆所不能載皆有一式備人攷製泰西機器之屬若火車火船織絨鍼縫等器均具體而微苟能一二尋繹其意不難別創一格以駕夫前入之上若斤斤於尺寸分秒間規倣之尙屬步入後墜不免泰西之齒冷也由院之右入後棟分屋五楹中間諸窺星鏡測天儀地球大小各數十具中之左爲置麟介之屋蝦蟇蟲

於人背盤盤大於車輪龜殼可以爲牀魚骨可以支柱非目擊者幾疑所說之誕左之左爲蟲豸之類大者蜈蚣長丈螯蝎如羊倫生致之人幾不敢立近從屋右登樓左樓爲繪畫室丹青水墨鉤勒工細均妙寫生以顯微鏡鏡之高下大小不差秒黍樓之中懸銅人圖四正背左右各一穴絡分明範土爲人而剖其腹血肉狼籍淋漓其中臟腑經絡逐一位置另有小圖各肖其狀倘醫者於此細心研究於治病之道思過半矣右樓爲儲書之所錦函玉軸滿架牙籤任人繙閱半係該國典籍及泰西之書雖欲以裨實用而蔑棄聖教大咤其先崇尚漢學之心識者嗤其無足觀也從右樓下入院之右蜀錦齊絨杭紬湖縐以及外洋之呢段羽毛色色備具若者緊細若者稀蠲若者悅目而不堪久留若者適體而較爲耐久一一區別而詳載之以便入市購買不受人欺法良善縱覽竟日坐東洋人力車忍飢回寓

初七日晴將入市購買古書東人邀觀勸工場藉便市物細詢其故則該國購地百餘畝以爲勸工之所凡有奇技異能創製器具者許於此設肆貨賣故物之良者雖致者舉集其間價皆劃一雖使五尺童子適市莫之或欺於是駕車往觀至則百貨駢列類皆精巧新奇之物每物一種列爲一肆如銀銅錫鐵器竹木器瓷器漆器各從其類每類不下數十百家非物之佳者不入場卽入場亦無過而問之者鬪巧爭奇令人目炫其設在場也欲人各竭其智巧所以獎其能而媿夫不能者斯其所以以勸工名乎尤足喜者中土書籍亦羣萃於此如四庫全書圖書集成佩文韻府等無不皆備更有中土終老窮經而未得一窺之書如易經註釋約三百餘種其他類是余嘗聞日本喜購中土書籍求之敢信觀此則人言真不我欺

初八日晴麥君約拜各東人初見若甚駭異旣而與之筆談并有通曉漢語者相與談論其洽日遂結羣來訪遂一一問其居處前往回拜無不祇候於門款接殷洽後晤一品川氏後裔留余午餐席間談及傳小方壺齋書也叢沙

博物院渠謂此為教育博物院所以使學者即物窮理即遵貴國所謂格物以致其知之教也若欲縱覽夫
瑤琳瑯玕珍禽奇獸以及同物異形遠方異種之屬則另有一博物院明日當同往一觀於是叮囑後約
而歸

初九日晴辰後品川君來寓遂同往昨所言之博物院至門渠出金片一授門者門者每人各送一籌以
憑入內抵二門司閘驗籌放行內有園圍大數十畝為院十有幾其中歧途紛岔路旁植木牌牌畫手指
入者視牌手所指處進而進初為藝器院其傳國之寶及各國衣冠制度在焉尚有漢唐時頒賜該國
衣物其二為金石院金銀銅錫五金胥萃外有各國所出礦石若者為金銀苗若者為銅鉛鐵錫苗皆書
明礦上石凡數千種玲瓏透澈皺瘦清奇或以堅固勝或以柔脆長斑駁陸離如洞天一品足令米顛下
拜也空青石數十顆中含人物魚蝦花草竹木皆真玻璃匣中目可得而望手不可得而玩再入則制作
院築隄造橋濬河造舟諸機器萃焉而堤形橋形舟式車式無不悉備或以竹木作成或以泥土搏塑無
不象形維肖力田制藝者則未耜鋤犂鑿鋤斤無物不備各國之用不同即各國之式互異一一詳註
其上考工記無此賅博也由制作院而西則有植物院百谷果實瓜瓞之屬為一院藥物為二院木本草
本藥生蔓生畢具何者為真何者為贗某種出何處某種為何名無不逐一記註以備考驗鱗介之院二
鯢鰐鯢帶鰐鯢鱖大小咸具有翼而能飛者有足而能走者有如人面有如犬形者爾雅未克盡舉其
名海經莫能悉窮其狀龍龜龜黿蝦蟹蚌螺之屬較教育博物院所見者尤大飛禽蟲豸之院二鳳鸞鸞
鷺毛采燦焉雞尾有長二丈餘者蝙蝠之翼大如車其餘奇形怪狀了不可以殫述非逐物籤明幾無一
可識其名矣走獸之院二角者吾知其為牛鬚者吾知其為馬犬豕豺狼麋鹿吾知其為犬豕豺狼麋鹿
麟獅虎豹刑天豸獬等獸皆則僅知其名今皆目擊其狀猴狖有三十餘種大者逾人小者如鼠猓獼猴

惡之狀森森欲攫人其餘各獸不惟其狀爲生平所未見卽其名亦生平所未聞其內爲珍寶院火齊木難珊瑚翡翠充實其中要皆希世之珍以玻璃匣鎖之任人平視院之外爲圍囿之東蓄鹿各一狐狸聲兔列屋而居均以鐵柱爲窗參養而馴擾之西囿則紅冠之鶴翠羽之鸞鷟一雙飛鳴上下一物蔽窗而黑以手撥之振翼高飛審視則蝙蝠身大如羊若蓄之小屋將斂翼而不得舒展雞尾長丈餘始知先在中所見之長尾雞非接續而成之者也囿中有池一泓澄澈呼名之鴨或紅如湓丹或藍如潑翠均異種也巡視甫周而守院者以扇門告循途而出惜思一遊未及一一手筆記之殊屬恨事

初十日晴辰後辭二星使仍坐火車回橫濱至停輪處遂閒步返寓中途望有林木陰翳處循路而往至則梅花繞屋不僅三百株入門而西牡丹數百本芽茁如椿小盆梅花皆已破萼疏影橫斜暗香浮動使林處士見之當視爲孤山終老也未初抵軍羅朗卿出紙數十卷皆東人所託書者伸紙揮毫至十二點鐘畢事兩腕如僵宿旒之醜不能自匿憶山舟學士有句云從今誓斫工極指嬾作供官待客人辭雖謙而實傲也

十一日晴朗卿邀觀大銅佛馬車行一點鐘約三十餘里一路山水清幽樹木叢蔭遙望富士火燄諸山歷歷可辨銅佛身高十餘丈露處平臺翹首跂足始克望其肩背近前摩挲首僅平其膝下昔周世宗毀銅佛鑄錢以濟民用曰使佛真身猶當慈悲割捨倘日人傲之亦可使青蚨飛布藉富窮氓也日本屋宇器具皆精巧細緻而均以小見長惟此佛則巍然獨大故往來東瀛者無不爭欲快觀也遊畢返寓已日色昏黃矣

十二日陰何張二星使由東京坐火車遠來送行遂同集於中華公所茗談半日兩公均以書劍地圖等見贈並候送江干良足感也午後登舟范羅二君同至輪舟三疊陽關依依餞送天涯海角萍水相逢判

櫂一時盡響何日江文通謂黯然魂銷惟別而已者也申初開輪迴望諸峰縹緲猶留戀而不忍徑去

十三日晴大風舟行內洋亦覺簸蕩蚤起凭窗閒眺忽見遠水旋波時隱時現注目凝睇者久之則一二巨魚露脊長二三丈有奇逐浪奔騰旋復飛出水面魚本潛物而忽飛躍識者謂今日風浪作惡即驗於此舟行敲側從人多堅臥不能起是晚微雨

十四日舟抵神戶夕陽在山見異邦人倚岸聚而相話惜不通其語言得暇將東京所見者誌之以詩脫稿就寢心緒殊煩悶也

十五日晴侵晨即上岸至何仰雲處適梁煒煌亦來自大阪飯後雇車往觀瀑布初行十餘里綠槐夾道翠柳環隄彷彿春深風景抵麓下車緣山池邇而上飛橋隱隱高接煙雲近視則劈分雙峽峭壁崩崖俯瞰萬仞剝木而凹其中支以渡水藉水勢下趨以激輪輪動而軸轉用以舂米碾麥殊省人力近山人家均引泉爲池水清如鏡瀑布一在山之陰一在山之陽故土人以雌雄分之這聞水聲潺潺萬竅怒號震耳怵心如飄風疾雨之驟至寒氣砭人肌骨既抵其處匹練懸空如玉龍數條蜿蜒天際人煙數十戶三五成村酒肆茶寮當墟均以少婦入室少憩開窗凭眺銀濤雪浪瀉玉噴珠取九天銀河置之於几席間作玩時雖葭琯潛飛而東西異地即寒燠異時如吹鄒子之律黍谷業已回春緩帶輕裘殊有暖意解衣磅礴肆中以丹橘進連噉數枚味甘而微酸全橘無子亦異種也醍醐灌頂涼沁心脾

十六日晴乘火車經大阪至西京日本舊都爲畿內山城國境因記周秦以前東海羣島皆蝦夷所居唐人泛海東渡九州始有流寓迨徐君房來挈男女數千生聚蕃殖遂成都會西京以山爲城無城郭雉堞之制周圍數十里氣象殊狹山水之奇爲生平足迹所初歷昔年奔走南北數省嘗謂桂林山水甲天下到此頗覺所見之隘惜輪舟約於未初開行不克周覽怱怱返駕計往返四五點鐘所行已三百餘里矣

午間返至仰雲處神戶領事廖君樞星邀飲未往而輪舟改於晚間開輪至十點鐘始回舟舟中望明石
嶺臺月影濛濛霜風刺骨瞬息過去殊未甚明了也

十七日早天陰辰後厯長門入平戶港羣山聯翩彤雲密布登樓四望煙雨溟濛詩曰如彼雨雪先集維
轍少頃王龍交戰敗鱗殘甲滿天飛矣

十八日半陰半晴已刻至鹿兒島輪泊約四點鐘啓行後重見諸山競秀澄波倒影如讀荆關畫圖在峽
中似覺逼仄舟忽經此心目爲之豁然

十九日微雨日中雨止申初舟泊長崎仍至廣裕隆晤潘鏡泉兄閱申報驚悉沈制軍於十一月初六日
大星殞地不禁失聲長慟

二十日天陰鏡泉邀遊各處心緒惓惓至觀音寺山下見石碑一上鐫筆冢二字筆勢挺拔西初回舟
二十一日微雪狂風陡作舟已開輪行數十里風大浪高不能出口仍回輪返泊長崎

二十二日風略息開輪行至綠水洋風復大作申酉間機輪震盪駭浪如山高從煙筒上冒過船旁窗板
玻璃有損壞者上中兩艙俱進浪水勢極危險西人閱風雨鍼陡失常慮有變全船皆驚竟夕不能成
寐頻年航海入津數次未有此番風浪之惡即詢之同舟諸人有自美國舊金山回者亦云此等颶風從
來未見也余來自吳淞泛洋厯長崎經內峽至神戶橫濱行萬餘里均無恙設非經此遂玩風濤而忘涉
海之險矣

二十三風稍息午間驚魂甫定尚搖搖如懸旌開窗遠眺海與天連了無邊際甫經出險對此猶覺心
悸

二十四日晴過景明銅沙一帶風景猶昨不覺驚定而喜午前舟抵滬上晚間附坐江輪船於次日回抵

鎮江防營

東洋瑣記

清泉王之春著

日本分野起北緯綫三十度止四十三度起偏東經綫十三度止二十九度地勢狹長形如蜻蜓其間小島錯雜大島外包長約四千餘里廣百里至三百里不等截長牽方以英里計之英以我中國三有十五萬六千六百零四万米

疆域四面瀕海所轄之地除琉球不計外統分四島一爲長崎延袤以至鹿兒薩摩一爲神戶旱道由火車以達其西京由西京以達其東京約程一千餘里一爲南部之阿波國與神戶對峙中隔內洋一爲箱館東南面太平洋北海與俄界毗連島中多山山多火燄故常患地震

長崎島形圓而四方廣數百里朝鮮時其西北隔海遙望中隔對馬一島琉球在其南小島錯列其北曰豐前筑前其東曰日向豐後口門狹隘有小島孤聳中央如羅星然由長崎以至鹿兒島與薩摩錯壤倚角海口較長崎稍寬以國都在東命名曰西海道聞自高麗來者皆言水勢下駛順逆懸絕固知地脈自西而東故其都會所聚風氣所趨亦遂因之由吳淞至此計程二千里

神戶屬兵庫縣由長崎至此近二千里山海回風濤險惡海中峙淡路島與明石相夾舟行所必經故明石爲險要必爭之地然由外洋徑往橫濱則此處礮臺亦屬虛設島形延長數千里陸路至大阪七十里乘火車四刻即達由大阪至其舊都西京又八十里聞由西京以達其東京須行十餘日華商居此約二千人

大阪人煙繁盛該國之精華萃焉而爲旱道入京之咽喉故該國昔年寇起先爭此地亦形勢使然也橫濱地形浩蕩無以制敵由旱道至東京計程八十餘里乘火車一點鐘即至寓華商亦約二千人由神戶至此計程二千七百餘里

南部島形如螭蝶高知爲之腹而阿波伊豫兩翼翕張在神戶之南與周防備後備前等處對峙以非通商之口岸行過此眈有停泊者

箱館爲通商之地在東京之東北方廣約千餘里每歲魚蝦海鮮出口銀約八九百萬逾海而北有小長島與俄之西界毗連俄之垂涎久矣一旦有事日人救援殊有鞭長莫及之勢故日人不敢與我連兵者懼俄人之乘其後也

該部無險可扼所恃惟海自輪船往來天險遂失五市既開巡港戰艦近窺庭戶惟神戶進口有明石礮臺與舞子礮臺對峙兩處水道窄狹爲神戶大阪之咽喉頗爲險要而明石礮臺將山掘成中通一竅以洩煙礮藥數發而後煙燄迷目咫尺莫辨舞子礮臺用石砌成礮門十五現已廢壞并無礮位神戶雖有礮臺兩座礮位過小地勢顯露雖能擊人而亦易受人之擊橫濱至東京陸路僅八十餘里無險可扼水路則輪舟可徑達其品川距外城約三十餘里有礮臺五座而在水中央藥彈須由小舟運送殊易斷其接濟

戶口合日本之四島九道八十三州計之共煙戶冊八百萬丁口男女共三千三百萬有奇

日人均短小精悍見中國人則驚爲納矣使宋譯卽高長或曰阿干譯卽大也男生年十六七以上三丁抽一五丁則役其二以充兵額練習三年仍放還家各理生業行古者寓兵於農之法歲無定期必派練一次亦准出賃捐免初年每丁出楮幣一百五十圓免役近年聞止須七十餘圓另有捕役名目分布各市鎮街口往來巡緝

兵額步兵四十六營常額二萬九千五百六十八名戰額則增至四萬三千名馬兵三營每營常額三百九十名戰額增至四百五十名礮二十行每行大礮二礮兵常額二千四百名戰額增至二千九百六十

名工程兵十七隊常額一千六百餘名戰額增至九百名合計常額兵三萬二千數百名戰額兵共增至五萬餘名分駐六鎮

六鎮一曰東京城統三師分置武藏一曰大阪城統三師分置攝津一曰仙臺城統一師分置陸前一曰名古屋城統二師分置尾張一曰廣島城統二師分置安藝一曰熊本城統二師分置肥後

官制內設三院九省而外以府縣開拓使轄之三院者一曰太政院大臣議官佐王出治以達其政於諸省者也一曰大審院所以掌邦法也內外裁判所隸之一曰元老院所以掌邦議者也上下各議員隸之九省者宮內以掌王宮外務以理邦交內務以治邦事大藏以制邦用司法以明邦刑文部以綜邦教工部以阜邦財陸軍海軍以固邦防省各置卿輔分其屬專其事而受成於太政官凡史館郵部電信鐵道圖書農商等局皆分隸於諸省外建三府三十五縣

民無私田租稅定額全國有米一千二百八十餘萬擔易米以錢明治八年以前每年收楮幣五千一百五十萬餘元十年因亂減租計收楮幣三千五百五十三萬餘元考日本初倣唐制取諸民者二十之一延喜大歷後豪強兼井制遂大壞迭因軍興加賦後不復減繁斂之臣倡爲定經界之議前以三百六十步爲一畝者改爲三百步而收稅如故賦於是益重現則世官益多國用愈絀取諸民者已十之七而民益不堪命矣

無物不稅彷彿惠卿手實之法國計歲入五千餘萬金地租爲鉅關稅次之其他車船有稅牛馬有稅煙酒有稅券紙雜器有稅百方搜括纖悉不遺歲出之款官吏月俸外養兵雇役開拓營繕宮省府縣各經費度支恆苦匱乏

國債共借民間私債三千餘萬元借英債二千餘萬元初議按年拍還聞現在僅能付還官利不能拍還

本銀

土產之運來中國以海鮮爲大宗箱館一島每年約出銀八九百萬橫濱神戶長崎不與焉次則硝磺銅運至中國者亦不少近年出茶每歲值銀十萬美國購之而蠶利亦興絲雖不佳然倭西人作法甚勻且細故外洋亦喜購之現聞開闢琉球荒土廣植甘蔗蓋因購我中國之糖出口之銀甚夥故思奪我利權刻聞復議入口糖稅每百元加抽稅銀三十元是欲使中國商民裹足不前也

學校東京太學生徒凡百餘人分法理文三部法學則英吉利法律法蘭西法律日本古今法律理學有化學氣學重學數學商賈學礦學畫學天文地球學動物植物學機器測算學文學有日本史學漢文學英文學以四年爲卒業分其優絀而定爲等級此外所設官學校甚多皆倣義塾遺意惟滄海乖隔不專重漢學雖參讀孔孟書既不敬惜字紙又不聞聖人之教擇邦之賢者爲師而崇祀之亦周禮祭於瞽宗之義復有傳各國語言學及女師範分門別戶均以四年爲定額

山海經雖載倭國事而不詳晰歷代史志於該部之輿地風土亦未能考據典確惟籌海圖編較爲詳盡然所述薩摩事亦多影響附會宋濂集有日本曲十首昭代叢書有沙起雲日本雜詠詩而僅有長崎民風文亦淺陋朱竹垞所收吾妻鏡一部均有罅漏蓋其時海禁未開且無輪舶往來士大夫均以風濤險惡莫肯前赴其處故未能形諸紀載近見參贊黃君公度著有日本雜事詩數卷於政事之沿革年代之遞嬗與夫山川風土服飾技藝考證典確一一筆之他日付諸棗梨知必有爭先快靚者

日本形勝首稱關東居民三千餘萬漁水耕山差足自給其種類傳自中土流寓既久風氣迥殊大抵男笨而女慧形細而質柔以武勇稱薩摩一島爲最其餘三島民風純樸東人所謂倭爲倭日爲日者是也三國志後漢書既載其求仙東來事今該國尚有徐福祠熊趾山復有徐福墓則日本之祖其係出我中